

Seëning van Giwar

85 Na 'n uur kom Giwar weer na My toe terug en wou aan My alles vertel wat daar in die sinagoge met die nuwe owerste bespreek is.

[2] Maar **Ek** sê: "Vriend, bespaar jou die moeite, want jy weet dat niks vir My verborge kan bly nie. Ek wil jou egter wel sê dat jy en Roban julle sake baie goed afgehandel het, want die owerste sou andersins nog heelwat oorhoops gewees het. Maar hy is nou daarvan oortuig dat dit sinneloos sou wees om iets teen die Romeine te onderneem en dus sal hy in elk geval vir 'n rukkie rustig bly. Julle mag hom egter nog lank nie heeltemal vertrou nie, julle moet steeds op julle hoede bly en hom so te sê nooit uit die oog verloor nie. Ek wil egter vir jou, omdat jy My ywerigste verdediger was en nog is, die vermoë gee om siekes deur 'n korrekte gebed en deur die oplegging van hande te genees, en die vermoë om in jou hart die planne van die nuwe owerste te verneem en die juiste middele daarteenoor aan te wend - maar dit moet elke keer dadelik gebeur, want anders sal dit geen uitwerking hê nie! Die korrekte middele sal jou ook getoon word. Ontvang dan nou My seën daarvoor!"

[3] Toe val **Giwar** voor My op sy knieë neer en aanbid My vuriglik. Ek lê My regterhand op sy hart en My linkerhand op sy hoof en op daardie oomblik word dit lig in hom. En hy sê: "Meester, in my is nou geen duisternis meer nie, alles in my is lig en dit lyk vir my asof my hele liggaam nou uit 'n diamant glinsterende deursigtige materie bestaan, waar die daglig ongehinderd sal kan deurdring. O Meester, laat my hierdie seën vir altyd behou, ek sal verseker weet hoe om hom te beskerm en altyd weet hoedat ek hom dankbaar in ere moet hou!"

[4] **Ek** sê: "**Bly altyd getrou in My leer, dan sal jy nooit rede het om te treur oor die verlies van die lig nie!**"

[5] Daarop staan Giwar op en merk dat daar, behalwe Borus en Jaïrus en Mirjam en My broers, geen vreemde meer aanwesig was nie, selfs die twaalf vernaamste leerlinge is nêrens te sien nie, en hy vra My wat daar gebeur het.

[6] **Ek** sê: "Alles moes so gebeur! Kyk, spoedig word dit herfs en dan kom die winter. Die oestyd is naby en Ek moet daaraan werk om arbeiders in diens te neem vir die veld en die wingerd. As in die jaar alles voorspoedig ingesamel is, is dit 'n goeie rus in die winter; as die voorjaar dan kom, sal ons weer met hernude kragtige volop werk kry.

[7] Ek sal vandag nog hierdie streek verlaat, want Herodes is 'n sluwe jakkals en die nuwe owerste staan in sy diens, en dit moet geen rede wees om van My huis 'n strydtoneel van die satan te maak nie. Ek het My leerlinge al 'n paar uur gelede weggestuur. Hulle gaan met My broer Kisjonah saam en sal daar in Kis wag op die leerlinge van Johannes en aan hulle verkondig dat die Ryk van Elohim naby gekom het. Hulle sal vandag nog met die leerlinge van Johannes hierheen kom en dan saam met My hierdie plek in die aand verlaat. Waar

ons sal heengaan sal jy, en nog baie meer, in julleself gewaar word.

[8] Werk dikwels tesame met Borus en Jaïrus, want dit is nou die twee waardigste manne in die hele Násaret; hulle besit My volle liefde en deur My ook die grootste barmhartigheid van Elohim! Want soos wat beide My liefhet en ken, bemin en ken nie een van My leerlinge My soos hierdie twee nie!

[9] Al My leerlinge sal op 'n sekere oomblik, wat nie so lank op hom sal laat wag nie, nog genoeg aanstoot aan My neem. Maar hierdie twee sal deur niks wat daar met My sal gebeur, op 'n dwaalspoor gebring word nie, want hulle ken My deur en deur. - Rig jou daarom volgens hulle, dan sal jy ook dit bereik wat hulle bereik het!"

[10] Met hierdie mededeling is Giwar heeltemal tevrede en hy vra net nog wat daar met die twee engele gebeur het, omdat hulle ook nêrens meer te sien is nie.

[11] **Ek** sê vir hom: "Kyk na bo, dan sal jy nie slegs die twee nie, maar nog tallose skares om hulle heen sien!"

[12] Giwar kyk na bo. Hy sien in die stralende lig die twee aartsengele en om hulle heen tallose ontelbare engele wat elke oomblik gereed staan om My te dien.

[13] Maar **Giwar** slaan sy oë weldra weer neer en sê: "Meester, ek is 'n sondaar, en my oë kon daarom die gewyde gesig nie meer verdra nie, maar my vurigste strewe sal wees om my vir so 'n skouspel waardig te maak!"

[14] **Ek** sê: "Doen alles goed en jou loon in die hemele, waarvan jy nou die rand gesien het, sal groot wees! Gaan nou egter weer na die sinagoge, want die owerste, wat hom nog etlike dae hier in Násaret sal ophou, mag jy nie mis nie, want hy beskou jou raad nou uiters belangrik."

Korah, die nuwe owerste, laat hom raad gee

86 Na hierdie woorde gaan die brawe Giwar terug en kom weldra in die sinagoge aan en sien dadelik dat die owerste hom al baie gemis het. Die owerste vra hom ook dadelik, waar en waarmee hy nou so lank besig was.

[2] En **Giwar** sê: "Meester, daar was 'n persoon met 'n gevaarlike siekte en ek moes hom help. En kyk, hy is genees en kan nou, omdat hy 'n reisiger is, getroos sy weg voortsit!"

[3] **Die owerste** vra: "Waarheen reis hy, wanneer vertrek hy en waar het hy vandaan gekom? Kan ek hom nog sien en met hom praat?"

[4] **Giwar** sê: "Hy is 'n Judeër wat uit die berge gekom het en het nou al na die dal gereis, jy kan hom nie meer sien of praat nie – tensy hy weer terugkom! Maar wanneer is dit? Dit kan nog baie lank duur!"

[5] **Die owerste** sê: "Met so 'n ontwykende antwoord is ek nie tevrede nie! Waar is hy onderdak, dan gaan ek self daarheen om eers goed navraag te doen na die reisiger wat deur jou genees is en wat

na die dal vertrek het. Want so 'n wonderbare genesing deur 'n fariseër is 'n belangrike saak en moet deur so veel as moontlik getuienisse bevestig word, omdat 'n mens die ander nie kan glo nie en dus geen waarde daaraan kan heg nie!"

[6] **Giwar** sê: "As jy meer wil weet as wat ek weet, wend jou dan tot hulle wat meer weet as ek. Want ek weet dat ek jou baie nougeset vertel het. Hoe kan ek jou meer vertel as wat ek self weet? Die onderdak was buite die stad in die huis van Josef die timmerman. As jy regtig meer daarvan wil weet, gaan dan daarheen! Vergeet egter nie om jou rug met iets te beskerm nie, want aan klappe sal daar sekerlik geen gebrek wees nie! Glo jy dalk dat die mense 'n besondere respek het vir mense soos wat ons is? Ek sê vir jou: Nie in die minste nie! By die geringste onbesonnenheid kan mens sy klappe uitgemeet kry, en geen Elohim weer dit dan nog vir jou af nie! Soos wat gesê is, jy hoef dit maar net één keer te probeer en dan sal jy al uit ervaring kan praat!"

[7] **Die owerste** sê: "Uit so 'n selfversekerde verhaal kan ek maar al te goed uitmaak dat julle met alle inwoners van Násaret teen my saamgesweer het. Maar dit sê niks nie, want vir hierdie byl sal ons wel 'n steel vind! Nou weet ek wel so min of meer waaraan ek hier blootgestel is! Ek hoop egter dat dit my in 'n kort tydjie sal geluk om die komplot heeltemal te ontmasker; maar dan sal dit vir julle en die hele stad sleg lyk! - Hoe kom ek by die huis van die timmerman?"

[8] **Giwar** sê: "Kyk maar by die venster uit! Daar, ongeveer tweeduisend treë hiervandaan kan jy duidelik die woning van die timmerman sien met die pad daarheen. Gaan maar en oortuig jou van alles – moenie die slae vergeet nie!"

[9] **Die owerste** sê: "Maar julle sal my begelei en vir my optree as lyfwag!"

[10] **Almal** sê: "Sal ons so gek wees! Dit sal ons nie doen nie! Wie 'n pak slae wil hê, hy moet maar self gaan!"

[11] **Die owerste** sê: "Nou dan gaan ek maar self in JaHWeH se Naam, en dan sal ons wel sien of iemand vir my, 'n gesalfde van Elohim, sal aanraak, want daar staan geskryf: 'Maar aan 'n gesalfde mag niemand hom vergryp nie; wee diegene, wat met sy hand aan die hoof van 'n gesalfde raak!'"

[12] **Giwar** sê: "Ja, ja, wat jy weet, weet ons al lankal! Maar gesalfdes soos ons, waarvan die salwing slegs maar ellendige begogeling was, is niks meer werd vir Elohim nie, en Hy sal ons pseudo-gesalfde hoofde nie beskerm as hulle heel regverdiglik aan die vuiste van ons vyande blootgestel word nie! Want soos wat ek al 'n tyd gelede gesê het, weet die volk maar al te goed wat daar agter ons en agter die tempel versteek is."

[13] **Die owerste** sê: "Dis om't ewe, ek gaan daarheen! Maar wee julle almal as die saak anders is as wat jy, Giwar, vir my gesê het toe ek jou gevra het waar jy was!"

[14] **Giwar** sê: "Dit wat jy wil weet, sal jy beswaarlik te wete kom, maar wel iets anders - en dit sal jou behoorlik pyn besorg, terwyl ons heeltemal geen pyn sal voel nie!"

[15] Na hierdie woorde gaan die owerste vinnig na buite.

[16] Maar soos wat hy op straat loop, roep **die jong seuns en meisies**: "Dit is die nuwe slegte owerste wat ons almal in die verderf wil stort! Weg met hom!" - Van alle kante loop jonk en oud met knuppels en klippe na hom toe, en 'n paar klippe raak hom ook al op sy liggaam en besorg hom blou kolle.

[17] Die owerste, wat maar al te gou merk dat die Násareners nie met hulle laat spot nie, keer ylincs na die sinagoge terug en sluit haastig die deur agter hom toe, waarop 'n hele lading klippe wat na hom toe gegooi word, ernstige indrukke agterlaat wat maar al te duidelik aantoon wat die Násareners van die nuwe owerste dink.

[18] Toe **die owerste** weer by die fariseërs kom, sê hy woedend: "Dit is julle werk, en ek sal weet om my op julle te wreek daarvoor!"

[19] **Giwar** sê toe baie geïrriteerd: "Wat sê jy nou, ellendige dwaas! Hoe kan dit ons werk wees as ons jou almal gewaarsku het om nie na buite te gaan nie? Slegs as ons jou by die volk sal aanbeveel, kan jy met die volk praat en onderhandel; solank as wat ons jou egter nie aanbeveel nie, sal jy steeds mishandel word so dikwels as wat jy dit sal waag om alleen in die stad op straat te loop! Want die volk vind jou al sleg net omdat jy jou amp gekoop het! Maar omdat jy regtig vir ons en ook die hele volk al dadelik begin tiranniseer het om orde deur 'n skrikbewind te skep, haat almal jou soos die hel, en ek sê vir jou dat dit nou die beste sal wees jy hierdie loopbaan aan 'n waardiger persoon kan verkoop, want vir jou toekoms gee ek geen stater (penning) om nie!

[20] Jy sal heel grondig moet verander, as jy by ons 'n goeie verstandhouding wil opbou! Maar dit blyk volstrek onmoontlik vir jou te wees. Hy wat uiterlik 'n vriendelike gesig voorsit, maar wat innerlik in sy hart 'n verskeurende wolf is, gaan beslis nie by ons werk nie, omdat ons almal merkwaardig genoeg soveel profetiese gees besit dat ons jou presies kan sê wat jy in jou deur en deur bese hart bedink!

[21] Ja, as jy jou hart geheel en al sou omvorm en jou deur die suiwer Wysheid en Waarheid van Elohim heeltemal sou laat deurgloeï, sal ons jou by die volk aanbeveel, en dan sal jy hier 'n goeie bestaan kan maak. Maar jou hoëpriester, jou Pilatus en selfs jou Herodes sal jou hier van geen enkele nut wees nie!"

[22] **Die owerste** sê: "Hoe weet jy dat ek nou net aan hierdie drie helpers gedink het?"

[23] **Giwar** sê: "Omdat ek ook een is wat 'n profetiese gees het, waarmee ek jou baie duidelik kan deursien, en waarvan jy jou onmoontlik voor ons kan verberg - net so min in Kapernaum as hier, en sou jy duisend dagreise hiervandaan wees, dan sal ons jou ook al op daardie afstand kan deursien! Daarom sal jy moeilik iets teen ons kan onderneem sonder dat ons vooraf al die geskikte en doeltreffende teenmaatreëls geneem het! Is jy so tevrede met ons? (word vervolg)